

BUSINÀ 89°

2013/2014

(Bellinaso Fabio – Raiteri Pier Luigi)

Buna sira, buna sira cari siuri, e ben, c'mè c'la va? A son propi cuntent ad vigvi: u smeja jeri c'as suma vist e a l'è zà pasà in atr ani. Pensè che, con ist, a suma rivà a utòntanov, utòntanov ani dla Divòta Cumedia. S'a pens che cui ch'i uardu le fiction an television, i stòn spiciònda ch'i fasu 'Don Matteo 9', noi chi a suma Gelindo 89! A puduma stè tranquil che im ciapu pü.

E pensè che in atr'ani a rivuma a nuvònta! E, per i nuvònt'ani, auruma fè pròpi na bela festa. Me a sper pròpi ad riveji, ma nént per me, no, se ch'i j'ei capì? Me a sper ad rivè an temp, in atr ani, a vighi turna sü el pont 'd la Sitadéla! L'ani pasà i j'avu bütà fora el cartèl con scricc 'si partel!', e i m'hòn dicc ch'i son partì da bon, 'sta vòta. Im l'hòn dicc e u bsògna fidèsi, perchè i j'hòn cuatà tüt e im fòn vighi gnente; u smeja c'mé quòndi che 't vai ant in negòsi per pruvè in para 'd braj. Ma me a j'hó ben capì el perché, i j'hòn dicc che 'i son amni fora col spali': speruma che quòndi c'ui ven fora da l'acqua tüt u rèst, is pont u seja nént bèle patòn, se dno, per finì i travaj, el midòndi um tuca a noi bitej!

Me a sper pròpi ch'i il finisu però, e che is Ponte Meier u seja bèl c'mé ch'i j'hòn dicc, tònt per vighi na ròba bèla rivònda a Lisòndria. Me am vis che quòndi c'a andava an gir a vendi i me furmagg, s'im ciamavu: "Ma c'mé c'l'è Lisòndria?", me ai diva: "Mah, a l'è na sità che s'l'è nént pròpi bèla, a l'è gnònc pròpi grama". Adès, quòndi che 't rivi a Lisòndria, at disi: "Oh mama!". S'a pens a Lisòndria, am smeja la sità degli ex: ex pont 'd la Sitadéla, ex sità dla siminera ad Bursalen, ex centro ferroviario del Nord Italia, che da quòndi c'ü j'è l'Alta Velocità, da chi ui pasa ammachi 'Stevu', el chisen lento d'Italo'; ex sità du laghèt di cigni, che ònche lur i son andacc veja, perchè i divu ch'i spurcavu tròp e i j'auvriu fèj paghè la tassa sui rifiuti, ex sità con i pü bèi negòsi an centro, che adès ònche an Curs Ruma, c'l'è amnia na rüdéra, i stòn sarònda: tra 'n pò', s'anduma avònti acsé, adventuma na 'ex sità'!

Speruma che presto a l'aba da finì, is dissesto! Perchè ormai chi a Lisòndria a l'è tüt fèrm! L'ünica c'l'a va sgagiàia a l'è la Straneo! Che, ònche ist'ani, a l'ha facc parlè ad Lisòndria an tüt el mond, quòndi c'a l'è rivaja zgonda ai Mundial d'Atletica.

Però, pensòndia ben ansüma, ist ani a j'uma facc du ròbi andò c'a suma i prüm ant el mond:

1) la zona pedonale pü cita del mond: cula d'adnòn al Munisipi! Che gnònc a la MinItalia 't na vighi jèina pü cita! Però u j'è da dì che da là ui pasa pròpi

pü ansën. Anche Babbo Nadal, ist ani, a l'ha pü pudì parchegè la so slita suta a l'Albero d'adnòn al Cumën e i j'hòn dicc che s'l'auriva avnì, a l'ava da purtè el so reni andrenta al parcheggio ad via Parma!

2) E a suma stacc bon a fè la prüma rutonda storta dla storia, cula dadnòn au Self, an Via Giordano Bruno. Adès, quòndi ch'e 't rivi dal cavalcavia ad Sòn Miché, i j'hòn scricc an s'el cartel: 'atension, rutonda tra trònta meter', che quòndi 't abi finì ad lesi, 't hai tampunà cul d'adnòn! Ma a l'è tüt calculà, perchè adès, pòc pü avònti, i j'hòn pensà ad drobi la caruserea comunai, acsé i sold ch'i ciapu nént da la 'Tares', i la ciapu dal machini sciapai: u noster sé c'l'è in 'comune virtuoso'. Pensè che i j'hòn creà l'Ufisi dei Vigili Tributari. Acsé, cun i Vigili nurmal e gli Ausiliari del traffico, at scapi pü: jën ut fa la mülta e l'ater el va a vighi, ant la dichiarasion dei redditi, se 't hai el gròn per paghè!

Sé, perchè putròp an Cumën ad sold u n'a j'è pü meja. I hòn gnònc pü i sold per dèj a scola al masnà, el prüm e u sgond da mangè! Acsé i j'hòn anventà el 'piatto unico': el problema, che ònche ist a l'è semper voi!

Ammachi ant in afari i j'hòn c'mensa a risparmiè, a fè la 'spending review': ant la Gionta; che me a j'hó capì perchè ch'i la ciamu acsé: perchè ogni tònt jën us gava e i na giontu in ater. E ben: l'ültima vòta, i j'hòn facc doi asedur con in cugnom sul! Acsé i risparmiu an s'i bièt da visita, 'Asedur Cattaneo' el va ben per tücc doi!

Noi chi a schersuma, ma a l'è pròpi in brüt periodo, ist. 'Sta crisi la mòla nénta e cui ch'is n'antaju per prüm, a suma noi cumerciònt: uardè c'a suma rivà ant in mument che ormai i crompu gnònc pü cui là ch'i pagu nénta! Ormai, la gent d'euro u na j'ha pü meja. Per forza, cun tüt is tasi c'u j'è da paghè! Me a so nènta c'mé chi fasu: tücc j'ani i cambeju u nòm e tücc j'ani i j'aumentu! An s'la cà, a suma partì con l'ICI che pó' a l'è dventaia IMU e che a duìvu nént paghèla, però pó', a la fen, a na paguma ammachi in tòc spiciònda c'l'a riva la 'Tuc', che, d'ad zà c'l'a smjava u nòm d'in biscuten, ancur prüma ad parti, i l'hòn ciamaja 'IUC', perchè chi u j'è pròpi da amnì luc! O forse i luc i son cui del Govern!

E per l'armenta? I j'hòn aumentà la 'Tarsu', che antònt a l'è dventaia 'Tares', ma ammachi per ist ani, perchè per el prosim ani i j'avu pensà ad fè prüma la 'Taser', c'l'a smiava tròp a u nòm 'd la pistola ad Narcis, e anlura i j'hòn còmbià nòm in 'Trise', che però me a dev nént paghèla, perchè a j'hó zà da paghè Tirsi. Ma la 'Trise' as divid an 'Tari e 'Tasi', che, s'im dòn da ment, chi a Lisòndria i devu ciamej 'Trà-sü', 'Tasi' e paga!

A l'è che at sai pü andó uardè! Dricia, sinistra o centro, i son tücc medesim: ma per forza! Da dla gent c'l'è stacia vutaia col Porcellum, se chi vori pretendi? I poru ammachi rasunè c'mé i ghen!

Adès però u smeja ch'i rivu i giuvu, speruma ben! Salvini dla Lega, dòp c'a

l'ha vensì el primari, a l'ha sübit cambià l'inno dla Lega: u l'ha scricc con Cota 'mi ricordo mutande verdi'. Alfano a l'ha fundà l'NCD, el prüm partì c'l'ha in nòm c'u smeja lo schermo d'in televisur. Renzi a l'ha vensì el primari; ammachì c'l'ava dicc c'a l'auriva fè el PDPD Partito Democratico Per Davvero. Speruma che adès a l'aba nént da fè el PDPD: jën per lü e jën per Letta!

E i vegg? Di Pietro a l'è sparì. Pensè ch'i l'hòn gnònc facc vutè al primari del PD! Fini a l'è andacc a Montecarlo a smuntè la chiseina ad so chignà... Bossi a l'è disperà: dòp c'a l'ha perdì el primari dla Lega con Salvini, a l'è andacc a parlè con so fiò. El prublema a l'e ch'is capivu nénta: per forza, Renso el parlava albaneis! Uardè che el 'trota' a l'è in fenomeno! An Italia la sta c'mensònda a amni fora la 'laurea telematica', lü a l'è zà andacc pü avònti: a l'ha pià la 'laurea telepatica', u s'è laureà an Albania, senza andèi gnònc na vota! E Silvio? Gram òmi, me um dispias propi per lü! Adès c'u s'era trovà 'sa murusa giuvna c'u j'ha druert j'ogg! Perchè, lü a l'è nént sagrinà perchè ch'el dev paghè trei milion d'euro al meis per so mujè, sinquònta milion ad liquidasion a Galliani o sessent milion a De Benedetti! No, lü a l'è sagrinà perchè a l'è amni a savei ch'el pagava utònta euro al chilu el curnèti! Ma el pü sagrinà ad tücc a l'è Dudù! Da quòndi che a Silvio i j'hòn dacc j'arresti domiciliari, is gram cagnen u na pó pü e el vig nént l'ura c'l'a finisa 'sa storia! Perchè Silvio, c'u sa pü c'sé fè, u sta tüt u di a tiréi la balèta, lü ansèma a tücc cui là ch'i vòn a trovèli: Putin, Brunetta, la Santanchè, tücc a tiréi la balèta e lü u dev curi per andè a pièla! A l'è per su lé c'l'ha ciamà au so padron ad fèj in partì ònche a lü: "Forsa Dudù"!

El prublema che, con tüt 'sta cunfusión, la gent la c'mensa a pensè d'andè fora 'd l'Italia: c'mé cul me amis c'a j'hó ancuntrà l'ater dì an Piasèta e l'era zà da in pòr 'd temp c'a l'avghiva nénta. E anlura a j'hó ciamà andó c'a l'era stacc; lü u m'ha cüntà: "A son andacc a fè el viagi per el nòsi d'argent e dòp ventising ani a j'hó purtà me mujè an Australia". "Ma scüsa, ma se ai ventising ani 't hai purtà to mujè in Australia, quòndi ch'i rivi al nòsi d'òr per i sinquònt'ani, andò 't la porti?". "Ma se 't hai capì? A vag turna a pièla!".

Basta, adès av present la me famija...